

Entrada ta gratis pero mester busca ticket:

Museo Arkeologico cu dia habri pa publico diadomingo awor

ORANJESTAD (AAN) – Den conferencia di prensa cu a tuma lugar diarazon, e funcionarionan Marguerita Wever, di Departamento Educativo di Museo Arkeologico y Arlinda Ruiz

Franken, persona encarga cu e maneho diario di MAA, a splica tocante e dia habri pa publico cu nan ta organizando.

Marguerita Wever a splica cu e dia habri pa publico lo ta

diadomingo 29 awor, entre 10'or di mainta pa 1' or di atardi.

Entrada lo ta den horarionan di 10 pa 11'or di mainta; 11'or pa 12' or; of 12' or pa 1' or. Y pa cada horario mester

busca ticket. Kiermen tin tres oportunidad y cada ora tin espacio pa mas of menos cien persona por disfruta di e exposicion nobo, y tur hende cu ta participa por duna nan sugerencia y remarcanan tocante e exposicion.

Marguerita a splica cu aunke entrada ta gratis, mester busca ticket adelanta. Esaki a cuminsa ayera y awe tambe durante henter dia. E intencion ta pa no stroba hende di drenta, pa tal motibo mester a entrega e ticketnan di adelanta segun horario.



Marguerita a menciona cu Museo Arkeologico a haci cierto prueba caba cu schoolnan basico, nos grandinan, turistanan, studentenan di IPA, y tur a duna nan un evaluacion y awor nan ta den e fase aki.

Diadomingo awor lo duna publico en general tambe e oportunidad pa yuda nan mira e exposicion y haci esaki uno mehor ainda cu nan sugerencianan.

Marguerita a pidi pa e interesadonan cu ta bin cu

mas hende, pa no busca mas cu cinco carchi pa persona. E carchinan ta indica bon cla pa cual horario e ta y e meta tras di esaki ta pa e dia bay masha agradable y no tin demasiado hende alavez den e sala di exposicion y no tin hopi hende wardando pafó mientras cu e sala ta yen ainda y otro nan no por drenta. El a agrega cu e apertura oficial lo ta dia 26 di Juli y den futuro lo duna mas informacion al respecto.

Marguerita a introduci tambe señora Margriet Lee-Trompken ta e persona cu ta coordinando e apertura completo y tur loko esaki ta encera y henter e siman di actividad cu lo tin rond di e actividad aki.

Seguidamente, sra Arlinda (Vivi) Ruiz-Franken a hiba palabra brevemente. El a mostra su satisfaccion di a ricibi miembronan di prensa riba e mainta aki y cu nan ta un di e promenan cu a bishita e exposicion nobo.

Despues, el a duna di conoce cu e exposicion aki ta financia pa Gobierno di Aruba, Fondo di Desaroyo Europeo y UNOCA.

“Nos ta masha contento cu e exposicion. Manera tur hende por wak falta aki aya un par di detaye, pero e team di Museo Arkeologico ta chikito pero hopi dinamico y e ta hopi orguyoso di por pone e exposicion aki pa e publico”, Vivi Ruiz a expresa.

Seguidamente el a invita e publico en general pa busca nan ticket pa asina Diadomingo nan por bishita e Museo den su edificio nobo.

Señora Ruiz a reitera cu e apertura oficial lo ta dia 26 di Juli pero nan ta spera cu preme cu esey lo por tin un periodo di “soft opening”.